

आकाशवाणी

खास-खास खबरों:-

- प्रधानमंत्री नरेन्द्र मोदी होंरें सब्भनें राज्य ते केन्द्र शासत प्रदेशें दे मुख-मंत्रियें कन्नै वर्चुअल ढंगै नै बैठक लाइयै- पच्छम एशिया संकट करी पैदा होई सकने आहले ईधन दी कमी ते महंगाई जनेए विषें पर चर्चा कीती।
- केन्द्री गृहमंत्री अमित शाह होंरें आखेआ ऐ पच्छम एशिया संकट दे बावजूद बी भारत नै ईधन दी सप्लाई जकीनी बनाई रखी दी ऐ।
- इजरायली ब्हाई हमले च ईरान दी परमाणु सुविधाएं गी नुक्सान पुज्जा- तनोतनी होंर बधदी सेही होंदी ऐ।
- प्रधानमंत्री नरेन्द्र मोदी होंर अज्ज नोएडा अंतराश्ट्रीय ब्हाई अड्डे दे पैहले गेड दा उदघाटन करगंन।
- लद्दाख दे ज़ोजिला पास कश बर्फू दे ल्हास पौने कारण 7एं जनें दी मौत होई गई ऐ।
- IPL दे 19में संस्करण दी शुरुआत अज्जै थमां पैहलै मैच बैंगलुरु च हैदराबाद ते बंगलोर दिएं टीमें बश्कार संजा साड्डे 7 बजे खेडेया जाहगा।



PM-CM Meeting

मुखमंत्री उमर अब्दुल्ला होंरें जंदे रोज प्रधानमंत्री नरेन्द्र मोदी हुंदी अध्यक्षता च लग्गी दी इक उच्चि सतह दी बैठक च हिस्सा लैता- जेहदे च पच्छम एशिया दी स्थिती ते जरुरी चीजें पर एहदे असर दा जायजा लैता गेआ। एह बैठक सब्भनें राज्यें ते केन्द्र शासित प्रदेशें दे मुखमंत्रियें ते उपराज्यपालें कन्नै वर्चुअल ढंगै कन्नै लोआई गई। बैठक दौरान प्रधानमंत्री होंरें केन्द्र ते राज्यें बश्कार सतर्कता- अग्रिम योजना ते निर्विघन तालमेल दी जरुरतै पर जोर पाया। उंनें सप्लाई चेन गी सुचारु बनाने ते जमाखोरी ते मुनाफाखोरी पर सख्त रोक लाने दा आहवान कीता। उंनें आखेआ जे हालात गतिशील बने दे न ते लगातार निगरानी दी लोड ऐ। उंनें भरोसा जताया जे टीम इंडिया उब्भरदियें चुनौतियें दा असरदार तरीके कन्नै सामना करोग।



Shah -West Asia

गृहमंत्री अमित शाह होंरें आखेआ ऐ जे पच्छम एशिया च बने दे तनोतनी आहले हालात करी आलमी सतह पर पेश आवा करदी दिक्कतें-रुकावटें दे बावजूद भारत च आम जन-जीवन पर कोई असर नैई पेआ ऐ ते साढे देसै-संकट दी इस घडी दरान बडा खरी चाल्ली कम्म कीता ऐ। कल संजा नमीं दिल्ली च इक निजी मीडिया घराने दे सम्मेलन दरान बचार सांझे करदे होई शाह होंरें आखेआ जे पिच्छले इक दहाके दे दरान पैट्रोलियम रिज़र्वें गी तगडा बनाने दे सरकार दे ठोस जतनें दी बदौलत गै आपूर्ति च स्थिरता जकीनी बनी सका रदी ऐ। श्री शाह होंरें आखेआ जे केंईयें होंरनें मुखें च ईधन दियें कीमतें च तगडा बादा दिखने गी लब्बा ऐ। उत्थै गै भारत नै पैट्रोल ते डीज़ल दिएं कीमतें गी तकरीबन स्थिर रक्खदे होई आपूर्ति श्रंखला बी बवस्थित ढंगै नै बरकरार रक्खे दा ऐ। उंनें आखेआ जे केंइएं मुखें च ईधन दे इस्तेमाल पर बंदिशां ते इमरजेंसी हीलें लागू कीते गे न पर भारत ने संकट दे इस समें दरान बी अपनी चाल बरकरार रक्खी दी ऐ ते अपने बसनीकें गी विपदा दा कोई माडा असर नैई पौन दिता ऐ।



Shah -SIR

गृहमंत्री ते BJP ते वरिष्ठ नेता अमित शाह होंरें आखेआ ऐ जे मतदाता सूचियें दी विशेश नज़रसानी दा मकसद ओकडे घुसपैठियें दे नाएं गी हटाना ऐ- जिनें फर्जी दस्तावेज़ें दी बिनाह उप्पर मतदाता सूचियें च अपने नांS दर्ज करोआई लैते दे न। कल संजा नमीं दिल्ली च इक निजी मीडिया चैनल दे सम्मेलन दरान बोलदे होई श्री शाह होंरें आखेआ जे बशेश नज़रसानी दा मकसद मतदाता सूचियें दी स्टीकता गी जकीनी बनाना ऐ। उंनें आखेआ जे

तमिनाडू ते केरलम सने केंड्यें राज्यें च SIR दी प्रक्रिया तोढ चाढी गेई ऐ ते उत्थे कोई बी बड्डी चैंता नेंई जताइयं गेइयां। शाह होरें आखेआ जे मते सारे ऐतराज्ज पच्छम बंगाल थमां गै आए न जिसलै के होरनें राज्यें च इस कार्रवाई गी बडे बवस्थित ढंगै'नै अंजाम दिता गेआ ऐ।



Jaishankar G-7 Ministers

विदेश मंत्री डाक्टर एस. जयशंकर होरें फ्रांस च जी-7 मुल्लें दे विदेश मंत्रियें दी बैठक दौरान कुल संसारी आर्थिक सुरक्षा लेई समुन्द्री रस्तेआ ज्हाजें दे आजाद तौरा पर औने जाने दी जरुरतै पर जोर दिता ऐ। इक सोशल मीडिया पोस्ट च जयशंकर होरें दस्सेआ जे बैठक दौरान उ'नें महत्वपूर्ण खनिजें पर इंदी मुल्य श्रंखला कन्नै सहयोग बधाने लेई जारी जतनें दी सराहना कीती ते नार्को आतंकवाद यानि आतंकवाद ते नशीले पदार्थें दा कारोबार करने आहलें बश्कार संडगंड करी पैदा होआ'रदे खतरें दे बारे च तफसीली गल्लबात कीती। उ'नें दस्सेआ जे बैठक दौरान मंत्रिएं बक्ख-बक्ख क्षेत्रें कन्नै जुडे दे खतरें पर बी चर्चा कीती। एहदे शा पैहले विदेशमंत्री होरें अमरीका दे विदेशमंत्री मार्को रुबियो हुंदे'नै मलाटी कीती ते बैठका दे बाहरें सार्थक गल्लबात बी कीती। एहदे इलावा उ'नें होरनें केंई मिम्बर मुल्लें दे विदेश मंत्रियें कन्नै बक्खरे तौरा पर बी गल्लबात कीती।



Israel -Iran Attack

इजरायल आसेआ जंदी रातीं ईरान दे प्रमुख बिजली-फोलादी ते परमाणु संयंत्रें पर हमले तेज करने करी पच्छम एशिया च तनोतनी उप्परोतली बदधी जा'रदी ऐ- जेहदे नै मजूदा संघर्ष ते संकट होर गैहरा हुन्दा जा'रदा ऐ। ईरान नै इनें हमलें दी निंदिया करदे होई आखेआ ऐ जे इस चाल्ली दियां कारवाइयां कूटनीतिक ते राजनयिक जतनें गी कमजोर करदे न ते गल्लबात लेई तैह कीती गेदी समें-सीमा दी बी एह खलाफवर्जी ऐ। ईरान दे विदेश मंत्री अब्बास अराघची होरें सोशल मीडिया पर इक पोस्ट च चेतावनी दिती ऐ कि ईरान दे दंऊ सब्भनें शा बड्डे फौलाद संयंत्रें ते संवेदनशील परमाणु संयंत्रें सनें प्रमुख बुनियादी ढांचे पर हमले लेई इजरायल गी भारी कीमत चुकानी पौगा।



PM -NoidaAirport

प्रधानमंत्री नरेन्द्र मोदी होर अज्ज उत्तर प्रदेश दे जेवर च नोएडा इंटरनैशनल एअरपोर्ट दे पैहले गेड दा उदघाटन करगंन। एह ब्हाई अड्डा कोई 11 ज्हार 200 करोड रुपे दी कुल लागत कन्नै त्यार कीता गेआ ऐ। भविक्ख दियें जरुरतें साब्वै त्यार- सब्भनें आधुनिक सुविधाएं कन्नै लैस इस निग्गर ते हंडन सार ढांचागत परियोजना दा डिजायन एहदे लक्ष "शून्य कार्बन उत्सर्जन" कन्नै कम्म करने दे साब्वै त्यार कीता गेदा ऐ। एहदे लेई ऊर्जा समृद्ध तंत्र ते पर्यारवण दे प्रति जिम्मेदार तरीकें गी शामिल कीता गेदा ऐ। एह ब्हाई अड्डा भारत दे सब्भनें शा बड्डे ग्रीनफील्ड एअरपोर्ट प्रोजेक्टें चा इक ऐ। एहदा उदघाटन भारत लेई इक वैश्विक विमानन केन्द्र बनने दी दिशा च इक महत्वपूर्ण मील दा पत्थर ऐ।



PM-MKB

प्रधानमंत्री नरेन्द्र मोदी होर 29 मार्च बड्डुलै 11 बजे आकाशवाणी पर अपने "मन की बात" कार्यक्रम राए देश-विदेश दे लोकें कन्नै अपने विचार सांझे करगंन। हर महीने दे खीरी ऐतवार गी प्रसारत होने आहले इस कार्यक्रम दी एह 132मीं किशत होग। कार्यक्रम दा प्रसारण आकाशवाणी ते दूरदर्शन दे समूलचे नैटवर्क- ए.आई.आर. न्यूज वेबसाईट ते न्यूज ऑन ए.आई.आर mobile app- डी.डी न्यूज- प्रधानमंत्री हुंदे दफ्तर ते सूचना ते प्रसारण मंत्रालय दे यू-ट्यूब चैनलें पर बी होग। हिंदी प्रसारण दे बाद एहदा डोगरी भाशा च अनुवाद प्रसारित कीता जाहगा।



Avalanche Zojila Pass

श्रीनगर-लेह राष्ट्रीय जनरैली सिडक पर कल ज़ोजिला दरें पर बर्फु दे ल्हास-तोदें पौने करी 7एं जनें दी मौत होई गेई ते केई होर जखमी होई गो। एह घटना उसले होई जिसलै मती ऊंचाई आहले इलाके च चलदी गड्डियें पर भारी मात्रा च बर्फ पौने करी उन्दे चा केई दबोई गो। इक बहु-एजेसी बचाव अभियान फौरी तौरा पर शुरु कीता गेआ ते बर्फ गी हटाने दे जतन जारी ना। इक सोशल मीडिया पोस्ट च केन्द्रीय मंत्री जितेन्द्र सिंह होरें इस घटना च 7एं जनें दे मारे जाने ते 5 होर लोकें दे घायल होने दी तस्दीक कीती ऐ। सिंह होरें गलाया जे घायलें गी सब्बै लोडचदी मदाद उपलब्ध करोआई जा'रदी ऐ। तोंआई उपराज्यपाल मनोज सिन्हा होरें सीनियर एहलकारें कन्नै गल्लबात कीती ते गांदरबल जिले दे ज़ोजिला च होए दे दर्दनाक बर्फु दे ल्हास पौने दे मगरा बचाव ते राहत कम्में दा जायजा लैता। उंनें सोगी परोआरें कन्नै दिली हमदर्दी प्रगट कीती ते अधिकारियें गी निर्देश दिते जे ओह फसे दे लोकें दी सुरक्षा गी यकीनी बनान ते प्रभावत लोकें गी हर मुमकन मदाद उपलब्ध करोआन। मुख्मंत्री उमर अब्दुल्ला होरें बी इस घटना च मारे गेदे लोकें दे परोआरें कन्नै हमदर्दी जताई ते डूहगा बसोस प्रगट कीता।



IPL

IPL दा 19मां संस्करण अज्जै थमां शुरु होने जा'रदा ऐ जेहदा पैहला मैच संजा साड्डे 7 बजे बेंगलुरु दे एम. चिन्नास्वामी स्टेडियम च मजूदा चैम्पियन रॉयल चैलेंजर्स बेंगलुरु ते सनराइजर्स हैदराबाद बश्कार खेडया जाहगा। एहदे बाद अगले त्रंऊ दिनें दे मैच 29 तरीक गी मुम्बई इंडियंस ते कोलकाता नाइट राइडर्स बश्कार मुम्बई च- 30 मार्च गी गुवाहाटी च राजस्थान रॉयल्स ते चेन्नैई सुपर किंग्स बश्कार ते 31 तरीक गी गुजरात टाइटन्स ते पंजाब किंग्स बश्कार मकाबला चंडीगढ़ च होग।



Nepal Oli Arrest

नेपाल दे साबका प्रधानमंत्री के.पी. शर्मा ओली होरें गी पिच्छले बरे उत्थे होए दे हिंसक जेनजी प्रदर्शनें च कथित शमूलियत दे आरोप च अज्ज बड्डुलै गिरफ्तार करी लैता गया ऐ। उन्दी गिरफ्तारी बालेन्द्र शाह हुंदे देश दे सब्बनें शा लौहकी उम्मी दे प्रधानमंत्री दे तौरा पर संगंध लैने दे इक ध्याडे बाद होई ऐ। भक्तपुर जिला पुलस रेंज दे प्रमुख पुलस कमीशनर सूर्य बहादुर खडका हुंदे मुजब साबका प्रधानमंत्री होरे गी उन्दे घरा गिरफ्तार कीता गया ऐ।



E.C. W.B

पच्छिम बंगाल दे केई हिस्सें च हाल च होई दी हिंसा ते भन्नत्रोड आहली घटनाएं गी दिक्खदे होई चुनां आयोग नै पुलस प्रशासन पर अपनी निगरानी बधाई दिती ऐ। औंदे महीने होरने आहलें विधानसभा चुनां कोला पैहले सब्बनें स्तरें दे अधिकारियें गी चेचे तौरा पर सख्त निर्देश जारी कीते गेन। मुख् चुनां अधिकारी हुंदे दफ्तरै थमां हासल निर्देशें मुजब सब्बनें गैर जमानती वरंटे दी पूरी संजीदगी कन्नै पालमा होनी लोडचदे ते फरार अपराधियें गी फगडने लेई विशेष कारवाइयां कीतियां जानियां लोडचदियां। आयोग नै भन्नत्रोड जां हिंसा करने आहलें पेशेवराना अपराधियें ते चुनावी हिंसा कन्नै जुडे दे लोकें दी पंछान करियै उन्दे खलाफ पैहले गै एहतियाती कारवाइयां करी लैने दा बी निर्देश दिता ऐ तां जे हिंसा जां गडबडी दी नौबत गै नेंई आवै। पच्छिम बंगाल च विधान सभा चुनां दंऊ गेडे च करोआए जा रदे ना। पैहले गेड तैहत मतदान 23 अप्रैल ते दुए गेड तैहत 29 अप्रैल गी होग। पैहले गेड लेई अधिसूचना संगारें जारी कीती जाहगा।

